



**REPUBLIKA E KOSOVËS**  
**REPUBLIKA KOSOVA – REPUBLIC OF KOSOVO**  
**GJYKATA THEMELORE MITROVICË**

Numri i lëndës: 2023:200648

Datë: 27.03.2024

Numri i dokumentit: 05513261

**PPP.nr.285/2023**

**GJYKATA THEMELORE NË MITROVICË**, Departamenti i Përgjithshëm, Divizioni Civil, me gjyqtarin Blerim Istrefi, në çështjen përmbarimore juridike të kreditorit SH.A. KUR “Mitrovica” J.S.C., me numër fiskal 600338033, adresa Rr.“Bislim Bajgora” p.n., Mitrovicë, kundër debitorit H.S Fsh. Zh K-M, për shkak të pagesës së borxhit në bazë të dokumentit te besueshëm, duke vendosur lidhur me prapësimin e debitorit të ushtruar kundër Urdhrit Përmbarimor P.nr.702/2018 të datës 31.10.2018, të Përmbaruesit Privat, jashtë seancës, me datë 27.03.2024, nxjerr këtë:

**A K T V E N D I M**

- I. APROVOHET PJESËRISHT** prapësimi i debitorit H.S Fsh. Zh K-M, **SHFUQIZOHET** pjesërisht Urdhri për lejimin e përmbarimit P.nr.702/2018 të datës 31.10.2018, për detyrimet që rrjedhin për periudhën kohore prej datës 31.03.2016 e deri më datën 31.12.2016, në shumën prej 1,239.86€.
- II. Mbetet në fuqi** pjesa tjetër e Urdhrit për lejimin e Përmbarimit P.nr.702/2018 të datës 31.10.2018 i lejuar nga Përmbaruesi Privat, në pjesën për përmbarimin e detyrimit të debitorit H.S nga M, ndaj kreditorit SH.A. KUR “Mitrovica” J.S.C., me seli në Mitrovicë, për borxhin kryesor për shfrytëzimin e ujësjellësit dhe shërbimeve të kanalizimit për periudhën kohore prej datës 01.01.2017 deri me datën 31.10.2018, në shumën prej 398.35€, së bashku me kamatëvonesën të llogaritur mbi këtë shumë, sipas normës vjetore të interesit prej 8%, nga data e nxjerrjes se katë aktvendimi, e deri në pagesën definitive të detyrimit, të gjitha këto brenda afatit 7 ditor nga pranimi i këtij aktvendimi, nën kërcënimin e përmbarimit të detyrueshëm.

**A r s y e t i m**

Përmbaruesi Privat, duke vepruar sipas propozimit të kreditorit SH.A. KUR “Mitrovica” J.S.C., me seli në Mitrovicë, me datë 31.10.2018 ka lëshuar Urdhrin përmbarimor P.nr.702/2018 të datës 31.10.2018 me të cilin ka lejuar përmbarimin në bazë të dokumentit të besueshëm, përkatësisht fatura të konsumatorit, të datës 01.11.2018, në emër të debitorit H.S Fsh. Zh K-M, për shfrytëzimin e ujësjellësit dhe shërbimeve të kanalizimit për periudhën kohore 31.03.2016 gjerë më datë 31.10.2018, në shumën prej 1,638.21 €, me të cilin ka kërkuar që të detyrohet debitori që kreditorit t’ia paguaj borxhin kryesor, së bashku me kamatën ligjore prej 8%, nga data e paraqitjes së propozimit e deri në pagesën definitive, si dhe shpenzimet e procedurës përmbarimore, të gjitha këto në afat prej 7 ditësh nga dita e pranimit të këtij urdhri, në të

kundërtën, të bllokohen llogaritë bankare të debitorit ose të bëhet regjistrimi dhe sekuestrimi i sendeve të luajtshme dhe të paluajtshme.

Kundër urdhrit për lejimin e përmbarimit, brenda afatit ligjor me datë 22.07.2023, debitori ka paraqitur prapësim në të cilin ka dekluar se e kundërshton propozimin për përmbarim për shkak te vërtetimit të gabuar te gjendjes faktike pasi qe as nuk ka pranuar fatura e as nuk ka nënshkruar kontratë dhe se në bazë të nenit 360 të LMD-së është parashkruar borxhi pasi që në bazë të veprimit të kreditorit, pra për shkak të mos inkasimit të borxhit në afatet ligjore, ka ardhur në shprehje zbatimi i institutit të parashkrimit të kërkesës së kreditorit për realizimin e një borxhi të tillë pa fajin e debitorit. Ne fund i ka propozuar gjykatës që të aprovohet prapësimi i tij ndërsa Urdhri për lejimin e përmbarimit të refuzohet si i pa mbështetshëm juridikisht dhe te pa argumentuar pasi qe edhe ashtu ka kaluar afati ligjor- parashkrimi për një kërkesë te tille.

Kreditori SH.A. KUR “Mitrovica” J.S.C., me seli në Mitrovicë, në afatin e paraparë ligjor ka parashtruar përgjigje në prapësim, me të cilën e ka kundërshtuar prapësimin si të pa pabazuar dhe të pa arsyeshëm sepse propozimi për përmbarim i plotëson të gjitha kushtet ligjore të parapara në nenin 29 të LPP-së, për tu konsideruar dokument i besueshëm. Sa i përket pretendimeve të debitorit se borxhi është parashkruar ka theksuar se të njëjtat nuk qëndrojnë sepse në rastin konkret kemi ndërprerje të parashkrimit për arsy se debitori në vazhdimësi ka pranuar shërbimet e kreditorit por qëllimi i debitorit është, që të ikë përgjegjësive dhe obligimeve ku i njëjti ka bërë pagesa për ujin e shfrytëzuar, por jo në tërësi. Si provë lëndës i kemi bashkangjitur Ekstraktet e faturave nga Librat e Kontabilitetit ku shihet se debitori i ka pranuar faturat dhe ka bërë pagesë të obligimeve kohe pas kohe por jo ne tërësi dhe shihet periudha e borxhit për te cilën kohe është i ngarkuar, kështu qe konsideroj se Propozimi për përmbarim duhet te përbushet duke u mbështetur ne nenin 27 pika 1 dhe neni 29 pika 1,2 dhe 3 te LPP-së për pagesë. Andaj, gjykatës i ka propozuar që të detyrohet debitori që në llogari të kreditorit në shumën e borxhit të mbetur prej 1,638.21€ dhe prapësimi i debitorit të hedhet poshtë si i pa bazuar.

Gjykata pas shqyrtimit të pretendimeve të debitorit të paraqitura në prapësim dhe kundërshtimeve të kreditorit nga përgjigjja në prapsim, dhe pas shqyrtimit dhe vlerësimit të provave që gjenden në shkresat e lëndës, duke iu referuar dispozitave të nenit 69 dhe 71 të Ligji Nr. 04/L-139 për Procedurën Përmbarimore, gjeti se prapësimi është pjesërisht i bazuar andaj të njëjtin e aprovoi pjesërisht dhe vendosi si në pikën I të dispozitivit të këtij Aktvendimi, ndërsa e refuzoi pjesën tjetër të prapësimit dhe vendosi si në pikën II të dispozitivit pasi gjeti se prapësimi në këtë pikë është i pabazuar, për shkaqet si në vijim:

Gjykata vlerësoi pretendimet e debitorit i cili pretendon për shkak te vërtetimit të gabuar te gjendjes faktike pasi qe as nuk ka pranuar fatura e as nuk ka nënshkruar kontratë dhe se në bazë të nenit 360 të LMD-së është parashkruar borxhi pasi që në bazë të veprimit të kreditorit, pra për shkak të mos inkasimit të borxhit në afatet ligjore, ka ardhur në shprehje zbatimi i institutit të parashkrimit të kërkesës së kreditorit për realizimin e një borxhi të tillë pa fajin e debitorit, gjykata duke vlerësuar pretendimet e debitorit lidhur me afatet e parashkrimit, pas vlerësimit të faturave kontestuese dhe duke iu referuar dispozitave të nenit 360 paragrafi 1, nën paragrafi 1.1 dhe paragrafi 2 të LMD-së (Ligji Nr.04/L-077), ka ardhur në përfundim se kërkesa e kreditorit pjesërisht është parashkruar.

Me dispozitën e lartcekur të Nenit 360 paragrafi 1 të LMD-së përcaktohet se “*1. Kërkesat të cilat parashkruhen pas një (1) viti: kërkesat për furnizimin e energjisë elektrike, energjisë termike, gazit, ujit dhe shërbimet e pastrimit të oxhaqeve dhe për mirëmbajtjen e shërbimit të pastërtisë, nëse furnizimi ose shërbimi është kryer për nevojat shtëpiake;*”. Ndërsa me paragrin 2 të Nenit 360 parashihet se: “Afati i parashkrimit rrjedh nga fundi i vitit në të cilin arrin kërkesa për pagesë”.

Në rastin konkret duke llogaritur afatin e arritjes për pagesë të secilës kërkesë nga fundi i vitit përkatës kur është lëshuar secila faturë, rezulton se kërkesat e kreditorit për periudhën prej 31.03.2016 deri me 31.12.2016, në shumën prej 1,239.86 €, janë parashkuar në kuptim të nenit 360 paragrafi 2 të LMD-së, pasi që propozimi i kreditorit për përmbarim është parashtruar me datë 31.10.2018 andaj të gjitha kërkesat e kreditorit që kanë arritur për pagesë para datës 31.12.2016, janë parashkuar sipas afatit një vjeçar.

Ndërsa sa i përket borxhit për periudhën kohore 31.01.2017 gjerë me datë datës 31.10.2018, gjykata gjeti se i njëjti është i bazuar dhe nuk ka vjetësim-parashkrim të borxhit të kreditorit në raport me debitorin për këtë periudhë kohore, referuar nenin 360 par. 2 të Ligjit për Marrëdhëni e Detyrimeve (Ligji Nr.04/L-077), në të cilën parashihet që afati i parashkrimit për çdo kërkesë të arritur gjatë një viti, fillon të rrjedhë në fundin e atij viti e që në rastin konkret për të gjitha kërkesat e arritura në vitin 2017 afati i parashkrimit ka filluar të rrjedhë nga data 01.01.2018, i cili afat zgjatë deri më 31.12.2018 dhe në rastin konkret nuk kemi kalim të afatit të parashkrimit për këtë periudhë kohore, përfaktin se më datë 31.10.2018 kreditori ka ushtruar propozim përmbarim, me çka ka shkaktuar ndërprerjen e rrjedhjes së afatit të parashkrimit konform nenit 369 të Ligjit për Marrëdhëni e Detyrimeve.

Lidhur me pretendimet e kreditorit në përgjigje në prapësim se kemi të bëjmë me ndërprerje të parashkrimit sipas nenit 368 te LMD-së, për arsy se debitori i ka pranuar rregullisht shërbimet e ujësjellësit ky pretendim i kreditorit nuk qëndron sepse nëse debitori i ka pranuar shërbimet e ujësjellësit dhe të kanalizimin nga kreditori, nuk paraqet shkak për ndërprerje të parashkrimit, duke u bazuar në nenin 360 paragrafi 3 të LMD-së, i cili përcakton se: “Parashkrimi rrjedh edhe nëse furnizimi dhe shërbimet vazhdojnë”. Andaj në këtë rast pranimi i shërbimeve nga ana e debitorit nuk ndërprenë rrjedhën e parashkrimit.

Në shkresat e lëndës nuk ka asnjë provë me të cilën do të vërtetohej ndërprerja e parashkrimit. Madje nuk ka asnjë provë me të cilën do të vërtetohej as pohimi i borxhit nga debitori. Me nenin 368 paragrafi 2 përcaktohet se “parashkrimi ndepritet kur debitori e pranon borxin”, por në nenin 372 të LMD-së theksohet se “Për ndëprerjen e parashkrimit nuk mjafton që kreditori ta ftojë debitorin me shkrim ose me gojë që ta perm bushë detyrimin”. Prandaj veprimet e ndërmarra nga kreditori nuk përbëjnë veprime të cilat kanë efekt në ndëprerjen e parashkrimit.

Prandaj, bazuar në të lartcekurat, Gjykata gjeti se kërkesa e kreditorit është parashkuar përsesën e lartcekur, andaj pjesërisht e pranoi si të bazuar prapësimin e debitorit dhe atë për shumën prej 1,239.86 €, e anuloi pjesërisht urdhrin përmbarim P.nr.702/2018 të datës 31.10.2018, të lejuar nga Përmbaruesi Privat, si në pikën **I** të dispozitivit të këtij aktvendimi.

Meqenëse në rastin konkret është vërtetuar se debitori ka mbetur borxh ndaj kreditorit për shumën e cekur në pikën **II** të dispozitivit të këtij aktvendimi, gjykata lidhur me këtë pjesë të kërkesës së kreditorit e refuzoi prapësimin e debitorit dhe e la në fuqi urdhrin për lejimin e

përmbarimit P.nr.702/2018 të datës 31.10.2018, i lejuar nga Përmbaruesit Privat, , për shumën prej 398.35€, pasi që vlerësoi se borxhi për këtë shumë nuk është parashkruar.

Nga arsyet e paraqitura, në bazë të nenit 73 të LPP, kjo gjykatë gjeti se prapësimi i debitorit pranohet pjesërisht, si në dispozitiv të këtij aktvendimi.

Sa i përket kamatës së aplikuar për detyrimin e aprovuar si në pikën **II** të dispozitivit, gjykata i është referuar nenit 382 par.1 dhe 2 të LMD-së.

Andaj nga arsyet e cekura më lartë dhe konform dispozitave të nenit 5.5, 17, 29 par. 1.2 dhe par.3, 69,71 e 73 par.3 të Ligjit të Procedurës Përmbarimore, lidhur me nenin 329, 360 par.1, 2 dhe 3, dhe 368, 369, 372 dhe 382 par.1 dhe 2 të LMD-së, gjykata vendosi si në dispozitiv të këtij aktvendimi.

**GJYKATA THEMELORE NË MITROVICË**  
**PPP.nr.285/2023, datë 27.03.2024**

**Gjyqtari**  
Blerim Istrefi

**KËSHILLË JURIDIKE:** Kundër këtij Aktvendimi, lejohet e drejta në ankesë në afat prej shtatë (7) ditësh, nga dita e pranimit të të njëjtë, Gjykatës së Apelit të Kosovës në Prishtinë. Ankesa parashtrohet përmes kësaj Gjykate.